


PADU DEL CARIBE



PADU DEL CARIBE

ARTISTA MULTIFACETICO

Publicacion na ocasion di su exposicion den
Biblioteca Nacional Aruba
20 november - 1 december 1995



Oranjestad
Biblioteca Nacional Aruba
November 1995

UN BIOGRAFIA CORTICO DI PADU LAMPE

Juan Chabaya Lampe, artista di television y di grabacion, pintor, compositor y pianista, ta un yiu di Aruba. Nos conoc'e como Padú Lampe. E ta conoci tambe pa su number artistico: Padú del Caribe. Padú a nace na Aruba dia 26 di april di aña 1920.

MUSICA

Como mucha hoben Padú tabatin interes pa e arte di musica. Na edad di 10 aña ya caba e tabata produci melodia simpel riba diferente instrumento musical, entre otro riba cuarta, mandolin, clarinet y piano. Y ta piano a bira p'e, su instrumento favorito.

Padú ta autor di un cantidad grandi di composicion musical, tanto instrumental como vocal. Y mayoria di su cancionnan ta na Papiamentu y na Spaño. Hunto cu un amigo di dje, e conocido compositor y pianista Arubano Rufo Wever d.f.m., nan a traha diferente composicionan. Entre e composicionnan aki ta aparece e piesa titula: "ARUBA DUSHI TERA", cu a keda proclama oficialmente como Himno Nacional di Aruba dia 16 di maart 1976. Aruba Dushi Tera a bira masha popular, como cu na aña 1954 Radio Kelkboom a graba e piesa aki cu e grupo "DE TRUPIALEN", bao direccion di Frere Alexius. Padú a toca piano pa e grabacion aki.

Durante e decada 1959 pa 1960, Padú a graba un gran cantidad di musica tipico Arubiano, consistiendo di algun piesa folkorico y otro tipo di musica compone pa Rufo Wever y Padú mes, y tambe di varios otro compositor Arubiano.

Na corsow Padú a graba un longplay so pa e cas diskero La Bonanza. Na Venezuela Padú a graba 10 longplay, cualnan a subi mercado cu e seyo di RCA Victor, Philips, Velvet y Palacio de la

Música. E disconan produci na Aruba mes tabatin e seyo Padú y e tempo ey a graba nan unicamente riba disco di 78 R.P.M. Riba e mes un tipo di disco, esta 78, pero cu e seyo MUSIKA, Padú a graba un cantidad basta grandi di disco di diferente compositor den e studio di grabacion di Thomas Henriquez na Willemstad, Corsow. E longplay di Padú del Caribe titula: "PADU DEL CARIBE EN VENEZUELA" tabata un tremendo exito, pa cual el a ricibi e PIANO DI ORO di RCA VICTOR.

Dia 1 di december 1978, e conocido y popular cantante y guitarista Arubano Skerre Arends a lansa un dobbel longplay y un disco 45 riba mercado, consistiendo di 24 composicion original di Padú del Caribe.

Un seleccion di 20 composicion di grabacionnan cu Padú a traha durante e decada di 1960 cu 1970 na Venezuela, a aparece riba un CD titula: "RECUERDONAN STIMA" cual CD a obtene e premio "RADIO GALACTICA FM TOP 20 AWARD 1993" como e CD mas bendi durante e aña ey. Tambe, pa e mesun CD aki, Padú del Caribe a ricibi e "DEN AMBIENTE AWARD 1993".

Tambe Padú a gana cu e mesun CD aki un distincion for di Radio Caruso Booi FM, como e CD cu a sali den e "5 TOP BAILABLE" na Antiyanan Hulandes y na Aruba na 1993.

Na oktober 1994 a subi plasa e di dos CD di Padú del Caribe. E CD aki ta titula: CU AMOR Y CARÍÑO. E CD aki a bira ganador di dos galardón, esta: RADIO GALACTICA FM TOP 20 AWARD 1994 como e CD cultural di aña y e DEN AMBIENTE AWARD 1994, tambe como e CD cultural di aña.

Diferente artista famoso di Aruba, entre otro: Sharon Rose, Dhaddy Brokke, Tica Giel, Erica Giel, Ludwina Booi, Mirugia de Cuba, Rufo Odor, Trio Huasteca, Trio Los Arubeños, a canta un cantidad sin fin di composicionnan di Padú Lampe.

LITERATURA

E interes grandi di Padú pa literatura, specialmente den e camponan di para-psicologia y metafisica, a inspir'e pa skirbi tres buki, dos na Ingles y uno na nos idioma Papiamentu. Su prome buki titula: "THE 3RD ELEMENT" a sali na 1960, publica pa Carlton Press na New York. Su di dos buki: HARMONIOLOGY (E arte y ciencia di biba den harmonia cu leynan universal) a sali na 1976 y publica pa Dorrance & Co. di Philadelphia, Merca. Na 1986 su di tres buki a subi mercado: CIENCIA ACERCANDO E MUNDO ESPIRITUAL. E buki aki a haya patrosinio di Prins Bernhard Fonds y a keda publica na Aruba mes.

PINTURA

Despues di su tremendo interes pa musica, ta bini na di dos luga su hobby pa pintamento. Padú ta un pintor autodidactico. Su estilo ta realistico, pero e ta gusta tambe pa hunga cu colo, crea composicion abstracto, cualnan, segun e mes ta bisa, mester duna satisfaccion pa wowo di esun cu ta observa su pinturanan.

Na edad di 18 aña el a pinta un paisahe tipico Arubano, cu a keda selecta pa e exposicion: NEW YORK WORLD'S FAIR na aña 1939 y pa cual el a ricibi un medaya di brons cu e inscripcion: FOR A NOTABLE CONTRIBUTION TO THE ART OF THE WORLD. Un otro di su pinturanan: FRUIT MARKET AT THE SEA SIDE (mercado di fruta cant'i lama) a gana un prome premio regional den e competencia internacional di arte, patrosina pa Alcoa Steamship Co. na Merca na 1954. Un stimado di arte a cumpra e pintura aki durante un exposicion cu tabatin na Hulanda. Esun prome, esta e paisahe tipico di Aruba, IBM (International Business Machine Corporation), cu a patronisa e World-Wide Art Exhibition na New York World's Fair, a cumpr'e.

Apenas Aruba Caribbean Hotel a habri su porta, cu ya caba alrededor di 30 pintura di Padú Lampe tabata na exposicion pa dos siman largo den lobby di e hotel.

E exposicion tabata patrosina pa Luis de Palm, conoci como Wichi, ex doño y director di "De Palm Tours". E exposicion aki a haya un acogida tremendo, tanto di parti di Arubiano como tambe di turista cu a bin bishita nos isla. Turista a cumpra casi tur e obranan cu tabatin na exposicion.

Na 1983 tabatin un exposicion den Cas di Cultura, patrosina pa CAVA (Comision de Amistad Arubano-Venezolano), na unda Padú a expone un total di 50 obra. E tempo ey diputado Frank Croes a habri e exposicion oficialmente. Despues di e exposicion di CAVA Padú tabata orguyoso di por a participa den e exposicion cu a tuma lugar den Centro Cultural Bolivar y Bello hunto cu Gustave Nouel, un pintor Arubiano hopi conoci aya na Hulanda. E exposicion aki a wordo inaugura door di e Gobernador di e tempo ey Señor Pedro Bislick y e Consul General di Venezuela. Tanto e cuadronan di Gustave como di Padú a wordo masha elogia door di hopi di e invitadonan presente na e apertura di e exposicion.

Despues tabatin exposicion mas chikito na Biblioteca Nacional, na unda Padú a exhibi varios di su cuadronan. Padú a participa varios biaha tambe den e Exposicion di Arte Popular, organisa e tempo aya pa Instituto di Cultura y Educacion, cu Hubert Lio Booi tabata dirigi. Un otro exposicion na cual Padú a participa, tabata esun di William (Bill) de la Vega na 1995. Padú tabata invitado di honor pa participa cu un cuadro den e exposicion aki di William (Bill) de la Vega. E tin un cuadro den exposicion den Galeria Harmonia.

Recientemente Padú a bira miembro di e grupo ARTISTANAN LOCAL ASPIRANDO HARMONIA. Den e caso aki e famoso pintor Arubano Gustave Nuoel a introduci Padú Lampe.

Padú tabata casa cu Daisy Lampe Croes (d.f.m.). Un yiu muher, Vivian, ta fruta di e union matrimonial aki, kende a duna nan dos nieto: Ervin Anaya, kende ta studiando medicina na Bolivia, y Sonia Anaya, studiando ingenieria ambiental na Hulanda.